



蒙古山脈志

田應煥題籤



注意
勘誤表

頁	總	四	五	六	七	八	九	九	十	十	十	十	十	十	十二	二十四	三十	三十二
敘	後	前	前	前	前	前	後	前	前	前	後	後	後	後	後	前	前	前
行	六	三	六	十	十	二	一	三	八	四	四	六	七	八	三	八	三	
				一一		至七												

蕃	顏喀	巴坤	泛隘	卓爾	皆出	稠秘	奇勒	哈勒	阿敦	山為	石壁	薩陽	註哈	曼	真觀	誤
暢	喀下	里											格斯			
	山脈	坤											斯山			
	上遺												下遺			
	一喇	巴	泛	淖	皆	稠	勒	勒	阿	為	石	薩	遺一	蔓	貞	正
乏	字	里	盜	爾	入	密	奇	哈	敦	山	壁	揚	口字		觀	
番		坤						哈	昆							

伯父笑塘公弁言

異時猶予思慎游學東瀛肄業之餘草蒙古通志若干卷陸續寄予未遑是正今四易寒暑矣時局愈變世務益棼龍堆沙磧正智者勞心之候也思慎因友人愆愚謀次第付梓整比山脈誌一篇先就請斧削予維近世紀方外輿地者惟張烏齋先生蒙古游牧記最稱善本然全書所載不以山川定方域而以方域繫山川則仍爲藩部要略作紀傳之表志而已無他史家體例與圖經異不得以後人譏誚班氏而擅變也今是篇所紀窮源竟委支幹相承有大地河山終古不改之氣象蓋其掇拾於西籍者多矣夫不龜手之藥大用之足以佐水戰而勝強敵通志之作固不容緩若夫闢文章之榛莽返制作於虞周則雖輟通志而成一亞東大山脈誌焉可也不悟譯學莫辨正訛點竄字句無關大要糾謬繩愆是

所望於海內君子

蒙古山脈志目錄

卷一

帕米爾

(葱嶺)

卷二

天山山系

卷三

崑崙山系

蒙古山脈志總敘

禹貢著導山之文後儒或分三條或分四列山脈之辨基此矣馬融王肅以導岍爲北條而不及河隴以外鄭康成以導岍爲陰列而不及松漠以北蓋僅據禹貢九州言之耳唐僧一行兩戒之說較爲詳明然言北戒自三危積石負終南地脈之陰東及秦華逾河並雷首底柱王屋太行北抵常山之右乃東循塞垣至濊貊朝鮮是爲北紀亦僅就真觀時北方疆域言之近世何願船紀北徼山脈謂崑崙大幹北包瀚海之外凡大幹所經之山山南水皆南流山北水皆北流一行所謂北戒皆不爲南北大分水脊僅可謂之中幹耳必極諸北極之下北海之濱而後北幹之支條脈絡始可詳辨又云阿爾泰山脈從天山而來爲正幹而東趨巴里坤之天山爲分幹日營八極榛闢千古爲功地學匪尠獨以興安嶺爲

北幹知內外之異而於東西界畫穿水續行直抵海濱之系未盡
明瞭視近世誌山脈者不能無憾焉夫大地之上帕米爾爲屋脊
萬山所由導也天山橫亘中國北部及中央亞細亞與阿爾泰山
同爲一系所謂北東行者也崑崙行中國之中部更起塞外支脈
繁衍與天山同等峻極而興安大嶺直東至於海自爲一系總計
東北西三方山脈名稱以數十計而統系不外乎天山崑崙茲紀
蒙古山脈起帕米爾高原抑古人導山之遺義也

蒙古山脈志卷一

神池谷思慎撰

帕米爾

(葱嶺)

帕米爾古稱帕米勒尼耶帕米者波斯語平屋頂也勒尼耶者世界也猶言大地一屋頂也

近世地理學者咸云帕米爾為世界之屋脊即基波斯語

轉譯為帕米爾

實萬山之祖載籍沿襲謂之葱嶺故葱嶺之名特著而帕米爾轉

堙沒無聞唐書西域傳云播密川四谷不用王命播密川即西域

記之波謎羅川皆帕米勒尼耶譯音之轉也帕米爾連山攢聚南

北二度有餘

南至因都庫什山北至阿賴嶺

東西約二度

東至赫色勒牙克山西至噴赤河什克南地

其間山

脈隆起界為數區各異其名而終不離帕米爾之稱如塔克敦巴

什帕米爾大帕米爾小帕米爾阿爾楚爾帕米爾

或作雅什里帕米爾

最著

稱四帕之外尚有郎庫里帕米爾薩雷茲帕米爾和什庫珠克帕

米爾

或作哈爾果什帕米爾

瓦罕帕米爾均以山嶺為界山勢東西行山頂高

於海面二萬數千尺各帕地高一萬二千尺至五千尺不等北至
後阿賴嶺南至因都庫什山係中英俄分領

自光緒十九年開議派員
畫界至二十二年竣事

其屬中國者有郎庫里帕米爾小帕米爾塔克墩巴什帕米爾
及大帕米爾之半自阿賴嶺而北天山山系是也自因都庫什山
而南崑崙山山系是也其別於一大山系之外者皆連繫之支峯
總稱之曰喀什喀爾諸山云

喀什喀爾諸山者延亘於疏勒府英吉沙爾廳莎車府之西
境凡喀什喀爾河上源及葉爾羌河上源西岸之山皆是其
著稱者凡五曰塔曼爾瑪山赫色勒山和什庫珠克嶺烏帕
勒山密爾岱山

塔曼爾瑪山在郎庫里帕米爾東距此不遠有喀喇庫里湖
附近四面皆高山其在西者曰攷甫曼峯拔海高二萬三千

尺湖水停而不流迤北有東西行之圓頂山不甚高又北有平地山之四圍水草豐富葉爾羌河出其麓由喀什庫爾干東望其峯特拔俊雄令人極目焉

赫色勒山又曰赫色勒牙克在喀什喀爾城西塔曼爾瑪山之北又西北連接阿賴嶺山頂圓平長百三十里小喀喇庫里在其南半大喀喇庫里在其北半爲東西分水界有楚什滿山口木司庫魯山口皆要道也山上有草有薪可充游牧喀什喀爾河出焉山之西麓所謂大帕米爾是也有山口曰巴爾提什在山之西南二十里西人或稱之爲阿克塔什平地云

和什庫珠克嶺在英吉沙爾正西塔什庫爾干之北連岡相屬上多積雪春融回莊資以灌溉嶺東有大池曰哈喇庫勒

喀什喀爾河支流雅滿雅爾河自其東出山徑危險行履困難冰化時澗水滿溢或不通人行云

烏帕勒山一名烏仔別里又曰烏帕喇特在喀什喀爾西一百二十里南連接帕米爾北至塔爾特庫里山口峯崖高峻僻蹊迂迴山口可通者三四處圖巴里克河出其麓山坡水渠分歧宜耕牧有卡倫爲中俄交界又謂之烏仔別里山豁極西之要道也

密爾岱山在葉爾羌西南二百餘里拔海高一萬尺山三成四時積雪不消布隆河流徑其北峯巒相屬連接瑪爾瑚魯克山又西與塔克墩巴什帕米爾相續其中產玉又謂之玉山有河出焉下流入於葉爾羌河

五山之外又有穆什山在喀什喀爾城西北一百五十餘里

通布倫嶺在城西羌瑋山在英吉沙爾城西齊齊克里嶺在葉爾羌城西鉄葉爾里葉克嶺在喀什喀爾西北二百餘里扣喀嶺在鉄葉爾里葉克嶺附近烏魯噶喇嶺在英吉沙爾城西凡此四百餘方里隨地異名大小不下數十而其爲葱嶺之支脈則確無少疑以延亘喀什喀爾地方者最多故又稱之爲喀什喀爾諸山云

葱嶺之名始於漢播密之稱首於唐

漢唐西域傳

後人因之以葱

嶺爲山而播密爲川

方輿紀要分注於于闐國

相沿相襲誌山者止屬之葱

嶺而不及播密良以暗於方言遂至失真夫中土葱嶺之傳因野葱遍生由物以命名波語播密以比平屋頂就形而加稱其實同一地也漢書西域傳東西六千餘里南北千餘里西則限以葱嶺晉釋法顯佛國記一月五日得到于闐進向

子合國二十五日至其國南行四日入葱嶺山到于摩國行
二十五日到竭義國國當葱嶺之中自葱嶺以前草木果實
皆異惟竹及安石榴甘蔗三物與漢地同從此西行一月得
度葱嶺葱嶺冬夏有雪度嶺已到北天竺有一小國名陀歷
順嶺西南行十五日道途艱阻崖岸險絕山惟石壁千仞臨
之日眩下有水名新頭河

即印度河也

魏宋雲洛陽伽藍記神龜二

年七月二十九日自于闐入朱駒波國其國疆界可五日行
遍八月初入漢盤陀國界西行六日登葱嶺自發葱嶺步步
漸高如此四日乃得至嶺依約中下實半天矣漢盤陀國正
在山頂十二月初入烏塲國北接葱嶺南鄰天竺唐辯機大
唐西域記活國土地平坦王突厥也管鐵門南諸小國從此
東入葱嶺葱嶺據瞻部洲中南接大雪山北至熱海西至活

國東至烏鍛國東西南北各數千里厓嶺數百里幽谷險峻
恒積冰雪寒風勁烈多出葱故謂之葱嶺又以山厓葱翠故
以爲名東行百餘里至菅健國又云越達摩悉鐵帝國大山
之南至商彌國國境東北踰山越谷經危履險行七百餘里
有波謎羅川東西千餘里南北百餘里狹隘之處不踰十里
兩雪山間寒風悽勁春夏飛雪晝夜飄風山中有大龍池東
西三百餘里南北五十餘里據大蔥嶺瞻部洲中其地最高
也池西派一大流西至達摩悉鐵帝國東界與縛芻河合而
西流東派一大流東至佉沙即疏勒國界與徒多河合而東流
唐書高仙芝傳云天寶六載詔討小勃律仙芝乃自安西今庫車
過撥換城今喀喇裕勒袞軍台即姑墨也入握瑟德城一作據史德城至疏勒登葱嶺
涉播密川即波謎羅川今赫色勒河遂頓特勒滿川行凡百日特勒滿川五

識匿國也又漢書西域傳捐毒西上葱嶺卽休循難兜西至
無雷宋史高昌西距西天竺路涉雪山葱嶺皆數千里高數
百丈上多連曼葱土人名爲塔爾塔石打班元耶律楚材西
游錄索虜城在大河南城已圯唐碎葉鎮故城墟也渡河百
里踰山丹嶺突厥時王庭也又西三百里經塔刺斯數百里
皆平川岡嶺迴沍甚得形勢方輿紀要播密川在葱嶺西漢
西域圖考捐毒休循二國在葱嶺中又云白皮山上葱嶺漢
爲葱嶺八國無雷居山脊依耐子合等國在其東難兜烏耗
在其西以今輿地考之捐毒休循今喀什喀爾附近之冲巴
什雅滿爾河北之希察克巴爾琿嶺南之薩爾巴噶什烏什
北之奇里克烏什西之胡什齊及蒙額特多爾諸回部落及
東西布魯特地是也漢葱嶺八國今之乾竺特博羅爾八達

克山三部地是也波謎羅川

即播密川

今雅滿雅河

見李史部西域圖考

也河

爲喀什喀爾河之南源

徐氏西域水道記

塔爾塔石打班今塔克敦巴

什是也塔刺斯卽唐書之怛羅斯在今特穆爾圖泊附近地夫漢時葱嶺諸國以地望證之爲今帕地播密川以地名水猶葱嶺南北河之稱也塔爾塔石打班卽塔克敦巴什之譯音塔刺斯卽哈格斯之轉音

今大帕米爾有哈格斯山

綜古今之名稱就地形之所在昔之葱嶺卽帕米爾地影影矣

蒙古山脈志卷二

天山山系

天山之名由來最著其系亘延中央亞細亞及新疆蒙古西伯利亞諸地在中央亞細亞新疆者以天山稱在蒙古者曰阿爾泰山近世歐人實地踏勘者絡繹不絕尤以俄羅斯人居多其記載與中土傳記往往歧異以比音重譯隨地稽名輾轉紛歧故坐亥豕之訛惟就山測量高下昭明溯源尋支脈絡精確斯則今勝於昔而中不及西者也今據舊籍所紀與彼都人士誌述詳爲對證區分爲天山山脈阿爾泰山山脈天山之支脈六曰汗騰格里山博格多鄂拉山博羅布爾山那林喀拉山廓克沙里山塔爾巴哈台山阿爾泰山之支脈五曰唐努山薩陽山賽留格木山杭愛山肯特山凡此皆我疆域以內之山也其統於一山系而非吾疆域者

不在此書範圍之內故弗列入

汗騰格里山天山最高之峯也拔海高二萬四千十六尺直東經八十度至八十三度北緯四十二度三十分山勢東西亘行矗立尊嚴羣峯環拱準語謂君爲汗謂天爲騰格里卽天山主峯之意也其支脈四

阿勒坦呼蘇山汗騰格里東行之支脈山勢斗絕上多樺樹和色爾河源出其下更東行至庫車之北爲額什克巴什山一曰白山其險阨不亞於阿勒坦呼蘇和色爾河東二源出焉又東南爲布古爾山山之北爲大裕勒都斯河

格登山爲伊犁鎮山在惠遠城西南五百餘里汗騰格里北行之支脈山崖前臨泥淖格登山出其麓續北行曰哈升嶺在惠遠城西南二百里重岡複嶂哈升水出其陽又北達於

伊犁河溪谷

華諾輝領與豁吉格爾相直亦汗騰格里之支脈上多杉松華諾輝水出其下又哈爾罕圖山在惠遠城南四百五十里其中產銅俗謂之鳳凰山又冰嶺爲伊犁溫宿分界山在格登山西櫟樺萌茁徑途惡險行人時墜馬瘖之憂

阿圭雅斯山汗騰格里東北之支脈石峯壁立其上森林周布有水出其麓因山以爲名又有沙嶺在惠遠城東南二百十五里山勢嵯峨登陟爲艱巴哈拉克水及玉季坤諸水出其麓

上述諸山之外有穆雜爾特山一曰木素爾嶺與汗騰格里相屬地多冰石有黑龍白龍二口兩峯並趨而南石壁渾成文緻旋轉絕無草木兩峯相距數十丈穆雜爾水流其中道

路險惡行旅爲艱山之陰有卡倫因山以爲名者也他如庫
克訥克嶺在庫車西北六百餘里博勒齊爾山蘇巴什山什和坦爾山皆
汗騰格里之支峯隨地異名耳

博格多鄂拉山天山最東之脈亦曰博克達山準語謂神聖爲
博克達猶云聖山也在廸化府城東西起烏克克山東極達子
湖直東經八十七度二十分至九十五度四十分北緯四十二
度及四十五度間其最高之峯拔海二萬一千尺東行至奇台
縣東南四百餘里山勢開展分兩支延亘其向南之支峯行百
餘里復折而東北直抵鎮西廳地方而止其向北之支峯至哈
屯溝復分爲二一正北少傾西行抵科布多境復東南行一東
行抵札薩克地至那林努魯山而止

巴里坤南山一作巴爾庫勒南山譯音之轉也回語謂有爲

巴爾謂池爲庫勒始因水以名地曰巴爾庫勒繼因地以名水曰巴爾庫勒淖爾山當淖爾之南遂以山爲名博格多鄂拉主峯東行至奇台縣東色畢溝一帶曰額得滅克達巴山又東百里山勢分二支南北趨兩山之間平川八百餘里其間諸水匯爲巴里坤湖南山巴爾庫勒延長二百六十餘里其東南隅曰庫舍圖嶺山形曲折盤旋有磴道二十四級其最高之峯達於雪線有山口曰南山口置門如關斥堠所在也山麓萬松叢立四時鬱青或以爲松關所在半山泉水湧出合而成河其最著者曰昭摩多河或作招莫多河又有尖山沙山皆山之支脈中有耕作地引渠溉田民以爲便云北山較南山加長延亘約四五百里自哈屯溝分趨北向旋即折而東曰薩混子山又折而東南曰滅成鄂拉山更轉向東北曰那林

努魯山後入於蒙古札薩克圖汗境曰成吉思山至沙漠而止其生物及形勢與南支略同而近沙漠之餘脈則林木矮小不復相稱也

那梅州山博格多自哈屯溝正北行之支脈也綿亘近二百里至科布多界山勢遂東西分趨東行之支峯曰妙雷魯雷山爲蒙古札薩克圖汗部及新疆之界山成弓字形長約八百餘里東南接那林努魯山西行之支峯曰巴巴蓋山有南北一支南支至博爾騰沙漠而止北支向科布多延亘少傾向西北經烏倫古河之右岸至烏倫古泊而止長約八百餘里山麓草木生殖間有可耕作之地其近沙漠者止矮草平均高度六千尺以上水泉乏缺行旅不便惟近烏倫古河流域有土爾扈特人從事牧畜焉

博羅布爾山與那拉特嶺同爲一脈天山最大之彙山也自阿
昆敦山口而北其山屬之博羅布爾自山口以南其山屬之那
拉特起汗騰格里山蜿蜒東行至阿昆敦山口有巨大支脈西
北奔馳卽博羅布爾是也拔海較高故以之爲山脈之總主
博羅布爾山延長約千里而遙其最高之峯一萬九千尺直北
緯四十四度東經八十三度之間東起阿昆敦山口西迄伊犁
之奎屯河源阿昆敦山口少西曰哈喇古顏山哈什河出其南
麓延亘忽開忽合諸無名之水咸自山中流出而合於哈什河
山鮮林木惟水道經流之地喬柯交蔭山共分十餘支南北奔
赴巨壑空谷之間豐草繁茂登高遙望若蒼龍十餘更西北爲
吉爾馬台山四面高阜中爲曠原周可十餘里中有林木頗稱
繁殖東南峽中怪石壘壘充塞路途中有溪流自峽中出又西

北爲呢勒哈山分東西兩阜張股如箕呢勒哈水傍西阜之左
南流達於山外自是而西北爲吉勒蘇胡嶺嶺南數里懸崖聳
峭危石倚空道轉山回馬行艱險山多璞石哈什河衝激其趾
又西北有胡吉爾台山烏里雅蘇圖山胡吉爾台水烏里雅蘇
圖水出其麓曰胡吉爾台至烏里雅蘇圖數十里間連岡疊嶺
土皆赤緹又西爲渾都賴山山麓有溫泉山之北麓接博羅布

爾山

一作博羅布爾
鳴蘇山

卽最高之峯也西南有谷口博羅布爾噶蘇水

由此達山外哈什河北岸大山綿亘數百里以此爲門戶伊犁
東境之要道也博羅布爾之西山勢稍傾向北方曰登努斯台
山又西曰明瑪魯山有水南流爲畢立海水又西北爲闐里沁
山南距甯遠城百餘里又西北爲阿里瑪圖山阿里瑪圖水發
焉上有果樹千林萬株儼若翠玳阿里瑪圖之東闐里沁之西

有稍凸出之峯曰毛海圖山山北高原草木繁殖庫克哈瑪將軍牧場在焉有水流其中不出山而止又西北爲卻羅嶺由嶺分爲二支一向西行一向南行向西行之支爲塔勒奇嶺伊犁北境門戶也山有谷十餘東南向皆有水南流最東谷曰石門溝楊柳交蔭松柏成林西曰果子溝谷長七十里北有松樹頭嶺峻阨異常林木陰翳重泉奔流曲折灣環初冬雨雪填谷行蹤斷絕尤爲險隘又西曰塔勒奇山察罕水自山溝中出又西曰阿里瑪圖溝山與塔奇勒相屬頗矮下又西曰松山和爾果斯河出其下又西曰都蘭哈喇山由山而西至卡倫卡之外俄羅斯所也山脈西行不止尙延長數百里云

那拉特山脈源起汗騰格里自阿敦昆山口與博羅布爾山分系東西延長約千二百餘里最高之峯拔海一萬六千尺

自東經八十二度至八十八度餘直北緯四十三度阿敦昆
山爲中央西與汗騰格里相接之處曰那拉特嶺循嶺而東
有山口山口之東卽屬阿敦昆亦作鄂敦庫由此山勢向各
處分趨上多松林間有柳樹山口兩岸尤爲稠秘中間流水
潺湲瘴氣漸清山水秀麗如畫惟遇雨雪坡滑難行空格斯
河出其西麓伊犁河之東南源也

阿布喇勒山那拉特向西之支峯也橫亘喀什空格斯兩
河之間爲傾斜形至兩河會合之點止其接近阿敦昆山
者爲阿爾察圖山松柏繁殖察罕烏蘇河出其南麓又西
北爲哲克圖嶺特穆爾里克嶺凡嶺陽之水皆出空格斯
河嶺陰之水入喀什河上有林木蒼莽奇拔中稍平緩有
徑可通又西北爲烏蘭庫圖勒嶺空格斯河自嶺南合於

特克斯河山勢至此已蜿蜒五六百里矣又西達於河岸而止烏蘭庫圖勒嶺之東特穆爾里嶺之西孤嶂高聳衆峯皆斷俗謂之獨山卽阿布喇勒之峯也直惠寧城正東自城闔東眺如翠屏實稱名山春秋祀之

自阿敦昆山口而東北那拉特之東巨者也山勢開展分二支南北并行南曰薩爾明山哈布齊爾嶺北曰雜哈克里特山兩山之間巴噶裕勒都斯河流經其下峯斷脈連相峙而立兩岸地皆平坦東西二山口河之所出入也漢之焉耆山卽指此南山水復山重自古稱爲險地又東爲烏克克山係博格多鄂拉山脈矣

那林喀喇山天山東南之支脈也西起阿勒乖山

一作阿拉葵山
接烏克克山距

阿敦昆山口約五百里重峯疊嶂形似馬鞍樹木稠密山徑險

窄更東南卽那林喀喇山之主峯由主峯而東南至喀喇和色爾台山分爲兩支一東行一南行東行之脈經吐魯番托克遜台又東經雅爾湖南又東南入沙漠中經察克瑪克台又東經沙爾卓爾之南又折向東北經托里湖之北又東經長流衛山勢漸向平緩南行之脈爲呼爾圖克套山山勢向東凸出直至沙漠而止其本脈更南向約數十里又歧分爲二東西行西行之脈充塞巴格喇赤湖南海都河之北東行之脈爲庫魯克塔格嶺東延亘白龍堆沙漠之北又東經伊勒呼瑪沙漠之北又東北至苦水塘又東北爲察罕得布色克山又東經蒙古札薩克圖汗部而入於沙漠又東爲諾顏哈喇山山特出沙漠中界三音諾顏更東遂隱伏不見統計山脈延亘約三千里實天山山脈最大之支脈也

廓克沙里山天山之初源汗騰格里葱嶺間之一大山脈也其勢傾斜起西南向東北自帖列克山峽而至栢斯塔格山延長約近千里其最高之峯拔海一萬五千六百尺凡葱嶺北河以北之山皆其支阜也約分二派一延亘廓克沙勒河之北岸一延亘同河南岸廓克沙里舊稱喀克善其峯直北緯四十度三十二分東經七十七度五十分自帖列克山口至川烏魯山口其延長約二百里川烏魯山口廓克沙勒河自界外流入之孔道也山脈似中斷逾河而北支峯更隆起焉

貢古魯克山廓克沙里河南岸諸山之統名廓克沙里山之支脈也自西而東直至畢底爾卡倫起帖列克初曰海奇山又東曰色勒克塔什山又東曰奇什罕布拉克山又東曰英阿喇特山又東曰蒙科素山又東曰科克巴什山又東曰伊

底克山又東曰臻丹山又東曰烏爾蓋列克山又東曰木資
魯克山又東曰烏玉布拉克山又東曰烏魯呼雅依拉克山
又東曰哈沙拉伊山與溫宿爲界山勢嵐嶂層複巖岫峻險
山間溪流縱橫有谷最隘白餘里略容單騎上多林木或矮
草有高原出地百尺以上廣七百里輪二百餘里東方漸高
西北稍下山泉泛隘若建瓴溫宿城在其麓又有楚午哈山
鹽池溝山其地產銅設廠二上曰雅哈阿里克回語近邊之
謂也

木素爾嶺亦曰造哈嶺廓克沙里河北岸之山其源爲廓克
沙里嶺東北行接於汗騰格里今爲中俄界山層巒疊嶂峻
極無偶風行甚烈沙石爲飛其中深谷萬尋其麓冰巖累累
峽中冰河橫流草木乏缺最險之處長約四十里古所謂冰

嶺卽指此也

塔爾巴哈台山天山極北之支脈也自額林哈必爾罕嶺北行經阿雅爾淖爾之西凡奎屯河薩爾巴克圖河北岸之山皆是最高之峯拔海一萬二千尺

塔爾巴哈台嶺在塔爾巴哈台城北百里山極險峻山之北卽俄維斯斜米帕勒省地山之東南二百七十餘里有鄂勒霍綽爾山山峯高聳額敏河出其下又有郭哲爾德山俗謂之高吉登山在城東南二百餘里固爾圖河出其麓又有楚呼楚山在塔城東南百里楚呼楚水出其下又有巴克圖山在塔城西七十里山勢雄俊叢草繁殖又有巴爾魯克山在塔城之南林木叢密距城約二百里

阿拉套嶺塔爾巴哈台山脈西南之支也延亘薩爾巴克圖

河之北塔城條約以此嶺爲中俄界限山南之水俱入薩爾
巴克圖河東西綿連約五六百里其東麓折向北之曲曲地
曰瑪利山山之北麓與巴爾魯克山相屬山坡豐草繁殖畜
牧稱善林木蒼翠望之如畫而山巖之間以險扼著者亦復
不少

薩爾山一作齊爾山塔爾巴哈台山脈之一大支脈也其峯
直東經八十四度三十五分北緯四十五度五十二分東行
至科布多界又折向北至北土爾扈特三旗地又折向西北
和博克河之東烏倫古泊之西以及喀喇額爾齊斯河流域
皆山之支峯也

薩爾巴爾圖山薩爾山自土爾扈特三旗地向西北延亘
之支峯也稍北爲木斯島山又北爲納林喀喇山山之西

北地多沙漠山之北卽額爾齊斯河流域

阿爾泰山脈外蒙古最大之山也其源導自天山山脈自宰桑泊之北畔起分數脈蟠幄其巨於科布多高原東經九十度至百五度者通稱之爲大阿爾泰山此外支脈凡五曰賽留格木山在科布多河之北烏布薩淖爾之南曰唐努山在烏布薩淖爾之北烏魯克穆河之南曰薩揚嶺中俄分界大山也在貝克穆河上源曰杭愛山在三音諾顏境內曰肯特山在土謝圖汗車臣汗境內山脈平均拔海九千三百餘尺最高之峯一萬四千一百九十尺山頂四時白雪皓皚云

大阿爾泰山起科布多境內其頂直東經九十一度科布多城南支峯不一在新左旗牧地烏倫古河北岸爲胡圖斯山在札哈沁旗界爲拜塔克山又北接阿爾泰烏梁海界爲中

山又東經札哈沁遊牧而入札薩克圖汗部曰察罕度爾山
在中右翼末旗曰伊哈塔音山在右翼後末旗曰庫克西勒
克山那木山都忒嶺在右翼左旗又東至蘇台境人三音諾
顏界曰泥赤金鄂拉山山勢高大特逾羣峯又東南延亘至
右翼中左旗曰阿爾察博哈多綿亘數百里又東南經呼拉
喀烏浪淖爾之南山勢傾向東南斜亘於土謝圖汗三音諾
顏之間在三音諾顏境內左翼右旗曰上海山庫勒圖山在
土謝圖汗部左翼後旗曰哈喇哈達山曰徹徹山徹徹山之
東北曰上凱山山勢漸平緩又東遂隱於沙漠中

唐努山阿爾泰山脈最高之峯也在烏布薩淖爾之北烏魯
克穆河之南西起俄界東至三音諾顏左翼左末旗境自北
緯四十八度至五十二度東經八十九度一十分至百零一

度平均高度四千五百二十尺其最高之點曰吉布吉達哈

拔海一萬一千尺最西之峯曰巴什山

接俄羅斯托
穆斯克東界

巴什山之

北曰罕騰格爾山雅雷克穆河出其麓巴什山之南有察布

禪達巴山口中俄往來之道也由巴什山而東至東經九十

三度間為齊那克山克穆河繞其趾山坡平緩更東曰烏蘭

台戛山色楞格河分源出其南麓自是而南為哈喇哈達山

山之東北有顏連達山口又東北為哈喇薩爾德克山山勢

或峭拔或平緩起伏不一溪流匯繞中多草原可資畜牧焉

哈喇薩爾德克山之東為巴音烏拉山聳立於庫蘇古爾泊

之西岸泊之東為薩揚山脈巴音烏拉山之南延亘札薩克

左翼後末旗境為罕庫奎山其在中左翼左旗曰伯爾克山

庫蘭阿濟爾噶山巴彥集魯克山

一作巴彥
久爾克山

其在中末旗境內

爲東達山凡此數峯蜿蜒相屬鄂豐爾河流亘其南沁達賴湖匯其中險峻崎側卡倫在焉中有高平原草木繁殖重深稠密而色楞格河流域頗多耕作地獨以山之高峯積雪甚多谷中每有冰田行人稱艱險云

薩揚山中俄境界之大分水嶺係阿爾泰山東北支脈水出自山陰者爲俄國水域出自山陽者爲中國水域山頂直東經九十六度三十分爲不規則之弓字形起北緯五十四度斜行東南下亘五度至五十度弱之巴彥果勒河源平均高津雪線凡九千零五十尺乃至一萬一千尺最高之峯曰穆克薩爾吉克拔姆一萬二千尺其在中國烏梁海境內最大之山爲噶爾奇克達爾嘎吉貝克穆河數源發其麓其在庫蘇古爾泊之東北爲克斯尼克圖山更東南爲博古圖達巴

山折而東爲莫敦廬山又東爲貝勒蘇圖山山之北真達河經流其下山之南哈爾拉克河出焉又東延亘至色楞格河真達河匯流之地山脈遂隱伏不見總其全體奇峭特拔森林密布鳥獸尤多烏梁海人之採補者恃此山爲利藪畜牧之地則缺如也

杭愛山阿爾泰山脈中最大之彙山也西起札薩克左翼後末旗境經烏里雅蘇台東至圖拉河流域自東經九十六度至百零五度起北緯四十六度至四十八度五十分東西延亘約千八百里山頂直東經百零一度拔海平均二千五百尺最高之峯約近萬尺位於三音諾顏中左旗之東由山麓而西延亘右翼中末旗界內爲阿蘇哈木巴山有烏爾圖哈拉驛由是而北西有札們哈達山更北至哈喇陀羅海驛旗

之西境是也四山圍繞北曰哈喇額納南曰和古吉東曰濟爾噶朗圖西曰額勒索陀羅海中有窪地峻嶺深谷交錯其間草木叢生野花繁多濟爾噶朗之南麓二水出焉分東西流東名濟爾噶朗西名得勒果爾相合而爲鄂羅克河一作鄂洛該之上源右翼中末旗之西左末旗是也稍西北爲中左末旗地烏塔驛在焉驛之西有溫都爾庫圖山又西爲納林和碩山更西爲伊邪赫達巴嶺和都伊布圖里山衆峯併峙或稱之爲羣山溪谷亘繞其間矮小植物屬目皆是拜塔里克巨河經其下河側有同名之驛驛北西有圖阿喀都魯吉山山下爲札克河溪谷河右方之山曰札噶伊哈喇循是而西爲雜克驛即札克驛南阻薩貝克山西薄河河之右圍以德克里伊烏拉嶺及通鄂和通嶺更西北爲沙喇烏蘇圖群山山接安

合台穆呼卡倫附近有驛爲霍博勒此百餘里耕作地散見
河之兩岸及西溪谷窪地牧草豐足山勢亦非峻峭壁立也
中左末旗之北北接中左旗有伊克沙巴爾山東北接札牙
班第達呼圖克圖有綽龍山西接右翼右後旗有庫克嶺山
皆傾斜適於畜牧霍博爾一作和波爾驛右翼右後旗境也札克

額沁山在其北察罕齊爾圖羣山在其東察罕淖爾嶺限其

西連峯併列隨地異名又有奔巴圖羣山亘其間沙喇烏蘇

烏拉山斜亘其東南又有額濟烏拉烏圖爾羣山屹立於中

央有二峯特出曰得目布圖山曰伊赫得目布圖山沙喇烏

蘇河一作沙雷烏蘇河經其下所謂沙喇烏蘇溪谷是也渡沙喇烏蘇

河而西爲克德克爾都魯古伊山由是而西爲左翼左旗屬

地有驛曰布穆巴南限以下固尼羣山北限以烏爾圖羣山

驛之西為小溪谷西望重山色景奇麗其超屹諸山之上者
 曰巴彥海爾罕山自溪谷通過途經哈布塔噶烏蘭驛有同
 名之山踞立高地遙望令人屬目又西為烏布爾濟爾噶朗
 圖驛一作烏布爾
吉爾噶蘭羣山碁布沙喇烏蘇流經谷中左為雅瑪圖
 赫山右為德勒山德勒山峽谷有河流其下阿勒坦喀達蘇
 山屹立於前更西為阿爾都特山札畢爾克山之側有阿
 魯吉爾噶朗圖驛驛西為伊克爾烏拉山又西布彥圖河
一作布
音圖流域是也為中後旗牧地河之東有驛曰呼濟爾圖驛
 東之山曰鄂托渾騰格里山驛西有多倫達巴嶺土語七嶺
 之意也過七嶺而西為坤都倫達巴嶺又西為阿斯哈圖山
 山之北西接屬烏爾克錫烈鄂伊布通山有同名之溪谷自
 下仰望屹然大嶽也又北有岱罕德勒山山下置岱罕德勒

驛其四有阿魯特古伊山西北有伊克布拉克山山麓有帖木爾圖驛南北皆山在北者爲烏尼爾圖群山在南者爲阿古伊圖伊克里山自是而西北爲特木爾圖山山西爲延通布拉阿瑪峽特木爾圖河迂迴峽中過此峽遂入於平原有驛曰舒魯克由驛而北爲烏里雅蘇台城以地有烏里雅蘇台山故以爲名山頂舊有炮台防準夷時所築也又西北有鄂錫克達巴嶺又西爲察罕齊老圖嶺嶺西接烏蘭德勒達巴嶺又西都蘭山數多奇峯相連聳峙由是而西和碩河溪谷是也更西山勢漸伏杭愛向西蜿蜒之脈自是而止

由山麓而東百里爲鄂爾吉圖都蘭喀喇山山南爲哈喇尼敦驛哈喇尼敦之東有賀通圖山形如長鞍背分二峯更東有哈達圖驛驛北十餘里有哈達圖山自是而東爲

哈爾圖高原 又東爲中前旗地

三音諾顏部

杭亦哈馬勒大山

翁金河經其下 又東曰都蘭哈喇山 又東入於土謝圖汗

境在土謝圖汗旗牧地曰薩喇噶山 在左翼左中末旗曰

科洛爾昆山山之西北九十里爲額爾德尼招 在右翼右

末旗牧地西曰烏遜珠爾東山

三音諾顏中前旗界

北曰齊克達噶

圖嶺西北曰圖隆奎山 在中左旗牧地曰薩勒噶山中右

旗牧地曰薩賓達班山 圖拉河經其北 哈爾阿哈河經其

西 在左翼前旗西北曰烏噶勒札山 右翼左後旗南境曰

達什隆山 由是而北隔以鄂爾坤河山脈 逾河更蜿蜒於

右翼左旗

鄂爾坤色楞格兩河間地

曰罕台山 在旗北曰達爾沁圖哈爾

噶那山 山尾與薩揚山脈相屬曰茂蓋河山 在旗西曰巴

顏濟魯克山 賽堪山 自西南綿亘而東北入旗境曰厄魯

墨得衣山又東爲西拉克山布昆沙拉山又東北爲布龍山更蜿蜒至色楞格鄂爾坤兩河合處山之北麓俱薄於色楞格逾兩河合處而東則肯特山脈是也

由山麓而北蜿蜒亦數百里在三音諾顏右末旗地曰鄂勒百稽山中左旗地曰依克沙巴爾札袞山達爾奇山中後末旗曰布林灰圖山達噶山布爾漢山哈爾占白他克

山諾羅草圖灰圖山在右翼前旗地曰賽堪山

卽上述之巴顏濟魯山賽

堪山是也

高大峻峭四方分行延亘約數百里又左翼左末旗

地曰達漢得爾烏蘇山向北山脈遂止於此

肯特山亦導源阿爾泰外蒙古東部衆山之案也自東經百零四度三十分至百一十六度四十分起北緯四十四度至四十九度五十分東西延亘二千四百里南北千里山頂百

零八度強北緯四十八度四十五分拔海平均二千五百餘尺最高之峯七千餘尺山脈分數支一向西北一向西南皆綿亘土謝圖汗部延長不過五百餘里其向東南行者自車臣汗中右後旗地分爲二一東北直抵俄羅斯薩拜喀勒省南境一東行至白一十四度間更分爲一一東北行至黑龍江呼倫池畔而止一東南傾斜至內蒙古浩齊特境

巴哈肯台鄂拉嶺肯特山向西南之支峯也東西長約百五十里延亘西南至土謝圖汗中旗地爲阿達海嶺色爾必嶺又西南爲厄圖克山圖拉河經其南麓又西爲巴顏朱拉克山山之西南爲汗山拔海高五千四百十二尺

布里圖
薩實測

東西延亘四十里庫倫在其北又西入右翼右末旗地爲陀羅什山哈達圖爾山察烏罕蓋山諾木圖布拉克

山又西爲哈瑪爾嶺又西入右翼左後旗地爲穆斯特音哈達霍順山總其全脈凡圖拉河哈喇果勒河中間之山皆其系云

布爾罕哈勒都那嶺肯特山西北之支峯也延長約四百餘里直抵恰克圖附近支阜歧分在土謝圖汗右翼左末旗地爲庫庫齊老圖山布龍山拜察哈達嶺邦吉山在恰克圖溪谷地爲伊克鄂博山布連蘭烏拉山又西爲和愛里達烏山

附近色楞格右岸

自是而西連屬於杭愛山脈

渾察沁達班嶺肯特山東南行之支峯也東北凸出在中後旗境內爲色勒格圖山向東南至中右後旗爲吉龍嶺又東南爲布塞山自是分爲二一東北行一仍東南行東北行者曰必爾喀嶺又東至中末次旗爲哈布濟朗裕山

又東北爲額林達班嶺又東北爲察罕博烈察山又東北入於俄羅斯境向東南行者爲噶拉嶺又東南至右翼中前旗爲庫里葉山拖羅山分中東西三峯据克魯倫河曲曲之地又旗之北境有巴顏烏蘭山西境有色爾克山自右翼中前旗南境山脈轉向東行經右旗中右旗地依札噶山在其東鄂羅克依山在其西南爲巴噶額里彥山西北爲伊爾蓋山又東入中末旗地爲庫特肯額里雅山伊克阿爾圖山額爾克納克山鄂斯奇山又東入車臣汗旗山勢漸傾向東北烏蘭溫都爾山阿爾圖山塔奇勒噶圖山哈喇莽筍山鄂爾楚克山皆在境內又東北經右翼左旗地爲鄂楚克山鄂博克圖山又東入左翼右旗地爲特格里木圖山哈噶勒噶山瑪勒胡爾山托克特依

山又東經中左旗北境爲和爾蓋伯爾克山又東山勢向東南特出支脈延亘抵內蒙古境內而本脈仍東行入左翼左旗境爲巴彥罕山鄂拉霍圖山又東北入中左前旗白雲東山自北突出延亘約三百里隨地異名草木繁殖自蒙古至俄國之成丹特邑必道經此山焉又東入中前旗境爲札爾噶山鄂克托木山和羅海圖山又東入黑龍江省境又東北百餘里而接於興安嶺山脈自中左旗境向東南之支脈或連或斷隱伏不常在左翼後旗境爲鄂爾布勒山布哈山烏蘭溫都山布勒格圖山巴圖汗山在右翼後旗境爲阿克索那山努庫台達班嶺巴彥海拉山霍勒博哈勒嘎嶺烏尼格特山更東南入內蒙古在浩齊特境內爲布爾勒吉山伊爾伯都山布當圖山阿喇忒山

犢山綽克恩都爾山在阿巴噶北境內爲庫庫勒山阿珀
濟哈山崑伯山巴哈噶札山霸特山自阿巴噶部南境山
脈隱與陰山脈相屬此外車臣汗右翼中左旗之察罕特
莫袞山庫里延山右翼前旗之布素勒山左翼中旗之卜
固尼和碩山特克瑪爾圖山固爾班爾龍山中末次旗之
德勒山中末右旗之多木達哲爾克特山鄂爾和山庫登
圖山托克台山內蒙古阿巴哈納爾境之布當山僧機圖
山喀喇阿魯克山皆源自肯特隨地續絕總其全體較杭
愛且加長洵漠北東方羣山之祖也

賽留格木山阿爾泰山西北之支脈在科布多西北境中俄
分水嶺也山之西爲俄羅斯托穆斯克省拔海高約三千五
百尺山勢自西南傾斜東北行接屬於唐努山脈其延亘中

國境內者自西而東南行凡科布多河之北烏布薩淖爾之南直抵札薩克左翼後末旗境長約八百餘里間以湖泊阻隔形似分裂而脈絡實無少差哈喇烏蘇湖北岸有最延長之山曰阿爾噶靈圖一作阿爾噶靈圖山其北端曰色爾山又北爲阿拉善吉爾烏拉山其峯多紅石又哲林淖爾之東曰卒爾里哈伊爾哈山又北爲烏尼格特山又北隔以奇爾吉滋淖爾奇勒諾爾淖爾之北西爲烏布薩努爾伊哈拉西拉山山之西北麓曰吉達莫尼山上有杜爾伯特王寺院莫克井之南奇爾吉滋淖爾之北東至札薩克左翼後末旗爲額魯哈伊爾罕山哈拉圖山滿達勒鄂博山巴音烏拉山斯俾伊烏拉山自是而東接於杭愛山其在俄羅斯境內者沿鄂畢河流域長約七百餘里云

漢書匈奴傳紀天山以十數北史及唐書突厥傳紀金山亦以十數二山之名固已特著載籍矣三州輯略曰天山自葉爾羌西南蜿蜒而來曰葱嶺至闐勒玉山分脈東南一支繞和闐而東行其西北一支繞英吉沙爾喀什喀爾之西又北行達布魯特境東行遶烏什之北又經阿克蘇之北又經庫車喀喇沙爾吐魯番之北綿亘七八千里而至哈密東北百餘里爲北天山又百餘里截然而止則在巴里坤東名鹽池山伏入地中矣此山爲南路回疆西路伊犁之分界山陽自哈密至葉爾羌南山北則由巴里坤至伊犁北路也洪亮吉天山贊曰自涼州以西抵伊犁凡七千餘里地勢極高天形轉下其橫亘南北界劃中外戴雪萬仞排雲百重半嶺以上靈禽不飛百步之外晴霰尙

眩者皆爲天山亦名雪山北人呼爲祁連山也又一統志
阿爾泰山在特思河西北綿亘二千餘里高入霄漢盛夏
積雪不消爲西北諸山之祖其頂在烏普薩池西北支峯
蔓壑分爲四支正北一支隨厄爾齊斯河以北至俄羅斯
國其東北繞特思河之北千餘里東爲湯努山即唐一
勢山又東北接杭愛山之陰北至色楞格河其南百餘里向東
一支爲烏蘭郭馬山繞奇勒稽思泊之北又東南爲白勒
奇那克科克衣山又東爲奇昂山空格衣河出其南麓烏
海河出其東北麓又北爲馬喇噶山布勒噶蘇台河出其
東麓又東北爲大山喀喇河諸水出其南麓又東北接杭
愛山之陽包哈瑞河他米勒河諸水其南一支蜿蜒不斷
納林河呼勒泰河哈流圖河納思克河布勒濟河哈巴河

奇蘭河喀喇額勒齊思河俱出其西麓哈勒奇薩河阿普
都河出其東麓山勢旋折而東布顏圖河出其北麓布拉
青吉爾河札克台河出其南麓又東爲阿爾泰山之尾又
東南爲台西爾山又東南復分二山如黑雲一道界瀚海
中其東爲庫克西勒克山又東北接巴顏山其南支爲都
忒嶺布帶山圖古里克河出其西麓又東南爲布勒堪山
空鄂洛阿濟爾罕山層峯不斷千餘里橫截沙漠爲阿爾
班阿岳爾達察嶺又東南爲古爾板賽漢山南爲諾默渾
山東爲五百根山至空可喀喇龍山而止自空鄂洛阿濟
爾罕山南向爲齊奇格納山拜轟鄂爾山查喇圖山至伊
塔特圖山而止其南八十里天山自西方來亦蜿蜒而東
南橫亘沙漠中千餘里又東爲活兒活圖山至色公哈兒

占山而止色公哈兒占山北去空可喀喇龍山二百餘里

南踰瀚海至套北陰山五百里松漠草詩註阿爾泰山之

東有三十三庫伯其中峯特出者曰汗庫伯猶言祖脈也

下臨希爾吉思湖流泉飛瀑頗著靈秀西域圖志阿勒坦

鄂拉為古金山在庫爾圖達巴西北三百里哈柳圖郭勒

發源西南麓其迤東境峯巒層沓亘數百里為北路名山

之冠水道提綱自哈密城北踰天山至巴勒庫兒巴坤北

即沙漠三百里又踰大山山自西北準噶爾東境起西二十六度五分極四十五度七分至止處綿亘沙漠中

徑十六度與西域之葱嶺天山彷彿過沙地山水無數水皆自流自止或瀦為湖

其山皆以阿爾泰山為祖其頂直西二十二度二分極出地四十八度七分在烏首薩池之北聳阿圖池之東北其

尾西二十度四分極出地四十六度五分支峯綿亘北漠東為湯努

山為杭愛山有色楞格鄂爾渾諸河北至俄羅斯國烏格

分在阿禮克台河之東薩克薩河之北

里達海灣入北海

流凡長九千一百餘里

其東南幹穿漠迴北挺爲肯

特爲大興安有黑龍江克魯倫河諸水東至海口入東海
南則岡阜迴旋數千里湧泉匯澤西則曲蟠累嶂以界沙
海疑卽古西金山也漢西域圖攷唐書金山有二突厥所
居金山爲今阿爾泰山其一卽金娑嶺在高昌北亦曰金
嶺唐置金嶺城亦曰金山蒙古遊牧記阿爾台亦作阿爾
泰今作阿勒坦蒙古謂金曰阿勒坦卽古金山在科布多
城西又杭愛山在西十四度北極出地四十六度鄂爾坤
河源之北直陝西寧夏北二千里許翁金河西北五百餘
里其山最高大山脈自西阿爾泰山來東趨踰鄂爾坤土
喇諸水爲大興安肯特諸山又自山西庫庫嶺北折環繞
色楞河上流諸水發源之處抵俄羅斯界千餘里鄂爾坤

塔米爾諸河皆發源於此杭愛譯言橐駝也山形似之又引齊氏召南語肯特山高大爲漠北群山東至大海之祖山之西支阜曰卽龍嶺又西曰特勒爾濟嶺凡諸嶺以南水皆入克魯倫河以北水皆入敖嫩河敖嫩河源在克魯倫河源西北三百餘里實小肯特山土人呼爲阿卽格肯山山南爲喀爾喀地山北爲俄羅斯邊界嶺之北麓水卽楚庫河源北流入色楞格河者嶺之南幹山西南麓水卽七拉河源西南流折而西北會鄂爾坤河入色楞格河者此嶺爲漠北一大分水嶺也自小肯特山東北行爲大興安山山包絡黑龍江諸水之北而東入海一支折而南分爲二幹一東南爲大肯特山起頂又東南爲必爾喀嶺諸山乃北黑龍南喀魯倫諸水之界綿亘千餘里至會合處

一西南爲圖拉源山又南爲喀拉秦嶺折而西南爲興安嶺爲東克魯倫西土拉諸水又西南而西北至土拉會鄂爾坤處自此而西北皆以阿爾泰山爲祖若論漠北大分水之處一東至東海一至北海則莫高於肯特山矣西域水道記漠北大山曰阿勒坦譯言金山也山頂極四十八度西二十二度二分其尾極四十六度五分西二十度四分朔方備乘魏源曰問漠北阿爾泰山爲北幹而僧一行所稱北幹者僅中幹則聞命矣惟阿爾泰山之南和闐山之北則當以天山爲中幹今乃謂中幹出于闐之南者何阿爾泰山之西爲額爾齊斯河其水經俄羅斯入北海故或疑北幹與葱嶺不相屬而謂四大幹皆原葱嶺者何兩山之間必有大川長江大河旣爲三幹中之大界水自當

各有天然入海之道乃龍門底柱皆冒中幹山脊而過人力開鑿而成竟莫知大禹未鑿以前黃河故道安在者何北幹中幹皆盡於興安大嶺則兩幹又似合爲一幹者何蓄是四疑貽誤千古矣夫北幹阿爾泰山之脈正從天山而來由伊犁博羅塔拉之西遶額爾齊斯河宰桑泊之東北而起阿爾泰山是葱嶺者天山之始祖天山者北幹之少祖以阿爾泰山爲正幹而其東趨巴里坤哈密者特其分幹分幹短而正幹長故北幹興安大嶺盡於東海視哈密分幹多行六七千里孰正孰輔判然徑庭矣哈密餘支東北盡於安西州之布隆吉河河北爲天山支麓河南爲祁連山正幹玉門關嘉峪關皆建於此正扼二幹之交會而祁連山脈則上起于閩中經青海下爲賀蘭山陰山與天

山之脈不相屬故自僧一行以來皆以三危積石爲塞垣北戒之祖不言祖於天山蓋葱嶺河源經回部匯於蒲昌海在天山之南于闐山之北故回疆三面皆山惟以東隅爲泄水之口則自蒲昌海東至玉關沙磧千餘里又自玉關東至遼西瀚海六千餘里卽北幹中幹天然之大界也使水行沙磧不滲不瀦則蒲昌之水必經龍堆出玉關挾布隆吉河居延澤之水東會克魯倫河黑龍江入海矣無如沙漠旱海水小卽滲水大卽瀦窮荒枯槁生氣不鍾於是潛源重發於青海之上遂以北幹之界水溢出中幹是爲一變河入中幹以後仍隨中幹左支山脈北流由甘州出塞繞河套以賀蘭山陰山障其北連峯疊嶂偪之入塞至雍冀間而中幹左右兩支交會界水愈狹不足受河於

是懷山襄陵或東決平陽或西泛關中尸子言古者呂梁未鑿河出孟門之上故禹不得不闢龍門析底柱以納之使河槽歸一是前伏出於中幹之底繼則顯冒乎中幹之脊是爲再變使循北幹界水之常不入中幹則大漠絕塞皆水饒沃之地人物繁庶而生氣何獨鍾中原乎天地之氣聖不能違乃漢武帝時齊人延年上書請徙河塞外不入中國試問徙於既入中幹以後乎則必使河從朔方冒陰山大磧而過也徙於未入中幹以前乎則必使蒲昌海水穿龍堆千里之沙再絕瀚海六千里之漠不滲不瀦而東也不察天地之氣不明水土之性不考支幹之形勢尙足語疏導辨方略乎若夫職方外紀以阿爾泰爲金山杭愛爲西金山外興安大嶺爲東金山最著北幹之脈惜無

遵用之者施世杰元秘史山川地名攷康孩地面註康孩
一作杭海一作杭愛又名顏靄即古之燕然山也北極出
地四十六度偏西十四度外蒙古三音諾顏游牧地直陝
西甯夏西北二千餘里其山脈從阿爾泰山來綿絡科布
多之西北折東南爲唐努山至錫巴里分爲二支一東北
越俄羅斯楚庫柏興一東南趨和林爲杭海山杭海譯言
橐駝也日本參謀本部西伯利亞地誌阿爾泰山脈自北
緯四十八度至五十二度三十分自東經八十一度二十
分至八十九度二十分充滿於多木斯克省即托穆斯克省之東
南隅更蜿蜒至支那界內面積凡十三萬七千五百九十
八平吉米每平方吉米日本五百五十坪每坪三十六平方尺長六百六十八吉米廣四
百四十五吉米平均高度一千二百九十米乃至一千三

百七十一米其最高之峯曰白耳哈高三千三百五十三

米

即米突三尺三寸

北西南三面圍繞以曠原東一方與薩揚山接

地理學者以兩山脈合稱故或謂之阿爾泰薩彥山脈云

俄羅斯參謀本部支那地誌天山山脈自帕米爾高原東

北延走蒙古及支那土耳其斯坦即指回疆之間連於阿爾泰

山更起西伯利亞與蒙古境界之雅布魯諾威山脈山脈自肯特山

延亘後貝加爾州為勒那河黑龍江分水大嶺

而延為斯塔諾威山脈

直至比令海峽而止

日本矢

津永昌清國地誌蒙古山脈自西而充於東北者為阿爾

泰山脈野口保興世界地誌阿爾泰山系占蒙古之北西

部總古今中外地理家之說亞州之山以帕米爾為總源

其向北部延亘者天山是也凡外蒙古西伯利亞以及黑

龍江以北之山北至北海東至比令海峽皆其支脈西人

所述雖小有不同而大體莫或差異特吾國自昔辨方輿者多未能實跡其地何氏北幹少祖之說條分縷列一掃群疑洵不愧博學通儒矣若夫一山數名今昔差別乃轉譯所致文字各殊魯魚賢形無可如何者耳以地望求之則庶乎其不差

蒙古山脈志卷三

崑崙山系

禹貢織皮昆侖國名非山名也崑崙山脈西起帕米爾延亘而東
充於青海中國本部及內蒙古滿州諸地其脈重厚疊積頗爲複
雜東漸次第分裂益淆亂隨地異名總其大要自喀喇崑崙起東
行經青海入蒙古境內約分爲六曰勒科爾烏蘭達布遜山脈曰
阿勒騰塔格山脈曰當拉山脈曰賀蘭山脈曰陰山山脈曰興安
山脈

喀喇崑崙譯言黑崑崙也爲崑崙山系之祖西起帕米爾東南

直東經七十四度傾斜東南行至克里雅

即于闐東經八十二度北緯三十七度

有一

支脈分向東南爲當拉山脈本脈更東北行至東經八十四度
又一支脈分向東北爲阿勒騰塔格山脈而本脈仍東行稱爲

勒科爾烏蘭達布遜山脉云延長共十度蜿蜒約二千五百餘里拔海平均一萬六千尺其最高之峯二萬五千四百六十尺西源起穆斯塔格山爲新疆印度之界山左右各出支峯右支充塞印度斯喀爾多左支則延亘新疆莎車府即葉爾羌地自喀喇崑崙

崙山口而東

東經七十七度

又三百餘里

東經七十八度五十分

左支則蜿蜒西藏右

支延亘新疆和闐州至東經八十四度而止在莎車境內者爲

庫克雅爾山聽雜阿布河出其麓在和闐境內者爲察克瑪克

曲底雪山哈朗歸山和闐河二源出其下又東爲克勒底雅

一作克里

雅

山長約千里綿亘至東經八十四度又東卽勒科爾烏蘭達

布遜山脉總山之全體而言充塞於葉爾羌河之東伊曼木拉泊之西昔謂之雪山又曰南山今則概稱爲崑崙西人指分爲西崑崙其支峯間亦有隨地異名者如蘇穆興山萬治山奇靈

山是也淤沙積雪烟瘴逼人冬夏不可行止三駝道中隔以冰
河行者無不稱艱全山童禿雜樹弗生惟谷地及狹隘處略見
灌木雜草耳

勒科爾烏蘭達布遜山脈崑崙東亘之本脈也昔有俄人踏勘
至此西人謂之俄羅斯山脈

近時西人誌地理往往沿稱
故附及之以便參閱他書

自東經八

十四度至九十度共分二段起八十四度迄八十八度稱曰托

古茲達坂由八十八度迄九十度曰勒科爾烏蘭達布遜由九

十度而東爲巴顏喀喇山

一作巴然
喀喇烏拉

西人所謂巴顏喀山脈是也

東達於百零二度自爲一段前二段支峯甚少左向新疆境內
凸出者托爾肯等五山而已奔馳不逾三四百里地荒僻名不
昭著惟巴顏喀喇一段延亘十二度蜿蜒六千方里江河之所
出支脈以百數十計今舉其大者如左

巴顏喀喇山

蒙古謂富貴爲巴顏謂黑色爲喀喇

一謂之紫山又曰黑山以山石黑

色故名其頂直東經九十五度十分北緯三十五度拔海高一萬八千四十尺共分三支曰布拉山曰布呼吉魯肯山曰都爾伯津山

布拉山一曰布倫山又謂之洞布倫山巴顏喀喇山西麓之

大支脈也西接於勒科爾烏蘭達布遜山四方奔馳支峯各

數百里其頂直東經九十二度四十分北緯三十五度拔海

高萬四千尺其在西南者曰勘金山又謂之西金烏蘭拖羅

海山

東經九十一度北緯三十五度九分

綿亘而東繞穆烏蘇河之北曰布克芒

內山其在西北者曰科科悉里山圖穆布里山高約萬四千

尺又西北爲錫津烏蘭托羅山又北爲巴顏哈拉得里奔山

連山疊嶺接續不斷至阿木齊齊山之西南孤羅板波羅濟

山之東北其在止西者為噶爾占領地多高原平均拔海七千尺富於鹹沼乏耕壤荒蕪沙磧矮草鮮生焉

布呼吉魯肯山巴顏喀喇山東北之支脉也連亘前行為阿

格塔齊欽山烏蘭得齊山馬尼圖山巴爾布哈山其支峯有

蘇曼山噶達素齊老峯巴漢哈圖嶺青海伊克哈圖嶺巴漢哈圖嶺東

察察嶺巴哈圖嶺西南蘇羅嶺青海西南少西二百里烏蘭布拉克嶺烏蘇圖搜

吉嶺好來嶺連岡相接高下無常群山之間河流交亘沼湖

星布山勢平均五六千尺或七千尺不等山之餘脈卑小如

平地石少土多林木叢生近水之域蘆葦交蔭又多耕作地

灌溉稱便蒙人資之以繁畜牧云

都爾伯津山巴顏喀喇東南之支脈也山分二支在黃河北

岸為阿木麻纏母孫大雪山在黃河南岸為仄胡爾巴彥哈

喇山自巴顏哈喇山麓而東爲巴顏渾圖嶺巴顏渾圖之東
南卽阿木麻纏母孫大雪山綿亘三百餘里上有九峯甚高
中峯獨出冬夏積雪百里外卽望見之番語以祖爲阿木你
以險惡爲麻禪以冰爲母孫猶言大冰山也直東經百度北
緯三十四度三分東麓至黃河折向西北流之地曰烏藍莽
乃山其支峯曰滂馬山齊普河出其麓曰哈爾濟嶺

哈爾濟嶺

曰

古爾板烏藍溫多羅山曰噶海山各出澗水三流合而北入

於河曰索諾水達西嶺胡魯穆蘇河出其下

呼烏蘇

支阜澗

壑不一而足長者百餘里短者數十里其東麓自藍莽乃而
東則爲西傾山脈延亘內地矣又南岸之仄胡爾巴彥哈喇
山西起哈喇答爾罕山東行爲查克喇峨山色納楚河出其
北麓又東南爲雜普通古查哈蘇拖羅海山山勢高大齊齊

哈納河出其下又東爲巴顏禿胡穆嶺又東爲郭洛克自是而東分二支而入於四川境遙接岷山山脈云黃河南北肥脊各異河北豐沃河南草木缺蕃暢人占多數深谷巨峽至今尙未悉行踏勘或有所述亦多得之傳聞故險夷有不能確定者焉

阿勒騰格山脈崑崙山自東經八十四度分向東北之支脈也延亘於新疆和闐焉耆二處又自焉耆東入甘肅循行於青海甘肅兩地之間實爲一大界山卽所謂祁連山亦謂之南山全體共分二段自東經八十四度至九十三度爲一段卽阿勒騰塔格山自九十三度至百零一度三十分卽祁連山非一山二名也茲分敘之

阿勒騰塔格山一名阿爾金山譯言金沙山拔海高一萬二千

八百八十尺俄人曾踏查至此謂昔屬沙漠與西藏相連山勢自西南傾斜向東北延長約二千里向左支阜有三曰昆折克圖拉爾山自東橫亘而西約四百里折而西北延亘於托蘭霍札博斯旦兩河之間而北入於沙漠曰哈喇木蘭嶺自東南向西北綿亘約二百里分爲二支一充塞於烏魯克河哈喇木蘭河之間一充塞於哈喇木蘭河博斯旦兩河之間皆伏於沙漠曰穆斯廓甫嶺自東南而西北凡百餘里向左右分行左支入於沙漠而止右支灣行東南復合於本脈向右支阜有二一自托爾肯地方南下與勒科爾烏蘭達布遜山脈連屬一支自齊桑地蜿蜒於巴勒根巴什井而本脈自東經九十度經白龍堆沙地南直東行至九十三度凡幽谷之間泉水匯流近沙之麓矮草不生其詳以紀錄未載不敢憶度云

祁連山脈導源阿爾金山起東經九十三度曰克博圖山黨
河西源出其北又東爲窟隆山黨河東源出其北又東爲阿
木尼巴延尊雀山阿木尼洞舒山阿木尼天沁察罕山山峯
甚峻無雪而白又東爲阿木尼兀善通布山阿木尼厄枯山
山東南至青海二百餘里其峯特出羣山又東爲歐西喜山
磁釜山阿木尼噶岡爾山由山而東南延亘百餘里至涼州
西甯二府接壤之間曰西龍口又東南蜿蜒於甘肅境內又
祁連山脈東行至東經九十五度二十分向東南分一支脈
爲拜生圖嶺庫德里山察罕鄂博圖山又東南至西甯府大
通縣爲大坂山更東南綿亘於大通河南此外支阜或起或
伏重疊回互名稱滋多而青海中之魁孫拖羅海山察罕峯
亦山之支脈中隔而東重岡再見爲日月山又東綿亘於西

寧府黃河北岸凡青海鹽池以北固無他山脈雜其中也道路崎嶇近水之域平坦利畜牧惟山谷間瘴氣甚厲兼生毒草山之高度平均六七千尺其中部拔海一萬六千尺或云萬四千尺遙望如黑雲冉冉而來土人歲時致祭焉

蒙古游牧記青海有十三山曰阿木尼塞爾泰山在青海東南曰阿木尼末倫山在青海東曰阿木尼那凌通布山在青海西南其峯尖直故名曰阿木尼巴彥尊雀山曰阿木尼洞舒山曰阿木尼天沁察罕山其峯甚峻無雪而白故名曰阿木尼兀善通布山皆在青海西北曰阿木尼厄枯山在青海西北二百餘里其山甚大曰阿木尼巴爾布安山在青海西其峯高險色黑故名曰阿木尼岡噶爾山在青海東北近甘涼二州之邊又名龍壽山曰阿木尼巴

延哈拉山在涼州邊外又名大荒山曰阿木尼扣肩古爾
板山在黃河東岸哈爾吉山東山有二峯獨高積雪不消
其一爲阿木尼麻禪母孫山卽大雪山也番語稱祖爲木
尼西海十三山番俗皆分祭之而以大雪山爲最四時禱
祀焉又有察罕陀羅海烏爾圖山在青海西南烏爾圖環
繞青海之濱亦有十三山土人皆名烏爾圖謂之十三角
云又有漢陀羅海山在青海南二百餘里曠野中有索克
圖山在青海西其西南五十里又有一索克圖山地多瘴
氣兼生毒草有烏克陀羅山高峯壁立在青海西南有固
爾班伊瑪圖山在黃河西岸青海西南三百餘里三山相
接皆名伊瑪圖繞濁羅池西有蘇羅巴顏喀喇山在伊瑪
圖山東北有石崖色黑多冷瘴故名蓋青海境內湖沼遍

野山勢因之隔絕蒙番語異稱謂不同稽核尤爲不易故
附之以資參攷焉

當拉山脈崑崙山自克里雅向東南延亘之大支脈金沙江怒
江之分水嶺也其最高之峯拔海八千三百五十尺自東經八
十二度東南傾斜入後藏爲哲佳郎布山又東爲納謨渾烏巴
西山長約千里連岡疊嶂隨地異名又東爲當拉嶺山脈最高
峯直東經九十一度二十五分北緯三十三度自山麓而東爲
青海境中隔以忒門他拉二池池南一水入怒江池北爲阿克
達木河入金沙江山逾河之處謂之當拉山峽循是而東爲格
吉札噶那山布勒西洛西山好勒嶺活呵洛好勒查罕峯卓爾
長山土虎爾河及烏捍河諸源出其麓北流入於金沙江又東
爲洛摩坎鄂巴須山又東爲蘇克布蘇七大山流出七大水東

北入於金沙江又東爲拉岡穆克瑪山又東爲巴爾喀達拉山
瀾倉江出其東南麓自是而東南山勢分爲二夾瀾倉江而行
江之右曰他念他翁山延亘西藏境內江之左曰薩拉嶺爲青
海西藏之界山二山更東南行入於雲南山之形勢類似巴顏
喀拉山重嶺斷峯間以湖泊支阜突出若自爲獨立者然其名
之可紀者爲喀穆隆山巴哈諾謨渾烏巴什山雜喀山查闌打
租山皆在青海境內曰噶拉達巴罕山邪耳馬巴山咳他噶里
布嶺納蘭嶺則西藏境內之名山也凡青海西藏間之縱谷峻
刻連嶺峭拔皆山脈之所凸出路途艱險羊腸迴曲者不一而
足番人占居其中未能詳悉考查中外人士引以爲憾焉
賀蘭山脈崑崙山東北之支脈爲陰山山脈中隔之大山西人
謂爲東崑崙之起點在甘肅寧夏邊外蒙古阿拉善旗內起東

經百零五度至百零八度北緯三十七度五十分至四十度三十分自西南傾斜東北分二支綿亘中國載籍多混而一之惟蒙古游牧記分賀蘭龍頭二山龍頭山一曰阿拉善山近世西人以賀蘭山爲南列阿拉善爲北列最高之峯拔海一萬一千尺曰布克圖山次爲蘇布爾山高一萬尺其阜爲雅布賴山努渾努魯山綏波嶺乞伏山甯羅山來伏山亦不刺山脫歡山山口甚多自北而南曰甯靖口鎮北口韭菜口大塔峽口小塔峽口小水口大水口鹿攀口汝箕口小賀蘭口大賀蘭口大韭菜口小韭菜口鎮北口大水吉口小水吉口小滾鐘口大滾鐘口獨樹口又南接邊城口青羊口乾溝口平羌口紅山峽道口柳泉口磨石口北岔口永安口雙山南口靈武口大盧溝口大沙溝口井溝口北城兒口木頭井口水井兒口鎮賊口崇慶口小

關兒口又南則石空寺堡及勝金關也西山口自北而南曰歸
德口紅兒口大風口小水高口大西番口小西番口逃軍口白
塔口偷牛口新開口宿鬼口白寺口黃峽口又南山勢灑迤而
東西其南曰山嘴口金塔口杏樹口赤木口東接邊城曰大佛
寺口山岔溝口其西曰靖湖墩口燕子窩口鐘口墩口馬槽湖
口鎮夷口崇慶口鎮北口寧安口向陽墩口殺虎墩口山脈從
首至尾長六百里形似張弓多水草楊木山谷之間時現耕地
云

陰山山脈源基賀蘭山以黃河中斷遂現隔絕起鄂爾多斯
高原東向綿亘約五百餘里更東北行至阿巴哈納爾旗自
東經百零八度至百一十八度山勢時起時伏高下不一最
高之峯曰哈喇額魯伊拔海八千五百八十尺其支阜散見

於內蒙古各部族若續若絕首鄂爾多斯旗左翼後旗境黃

河北岸烏喇特旗南境曰噶札爾山即陰山又東為居延山蒙古名昆

都農又東為狼山蒙古名綽又東為牛頭朝那山蒙古名吉老虎山蒙古

名巴爾圖又東為宿窺山蒙古名自老虎山而西有長流水蒲草泉

等險草木盛茂昔匈奴依阻其中以為窟穴山之向烏喇特

旗北凸出者有阿套山又北五十里為雪山蒙古名又北四十

里為伊克鄂博山又北五十里為帷山蒙古名又北二十里

為麥垵山又向旗西北凸出者七十里曰大青山蒙古名百

里曰赤城山蒙古名百二十里曰東德爾山百三十里曰西

德爾山百六十里曰鄂博圖喀喇山百七十里曰莫墩鄂博

圖喀喇山百八十里曰牀山蒙古名百九十里曰阿爾柴山

連山蒙古名馬神山蒙古名二百四十里曰巴顏喀山山

高大東西百餘里二百八十里曰碧柳圖山又自旗而東本脈入於茂明安旗境曰刻勒峯愛布哈河出其下又東爲固爾喀喇山其支阜有亦洛圖山哈拉海圖山和岳爾白爾克山方山蒙古名和爾和察罕鄂博山褪諾克山官山伊克哈達圖山齊齊哈爾察罕齊老山本脈自茂明安而東更延徑喀爾喀右翼部歸化城土默特二旗之間爲白雲山辱孤山岳索山巴爾加山一作屋孤哈達圖山拜音陀羅山祭爾山喀爾喀右翼部之東四子部落旗山脈經其南境曰得兒嶺錫喇木倫河出其南曰新婦山鄂爾多斯山喀喇和碩山納札海山其支阜曰阿爾哈林圖山一作殺羊山獨牛山陽山蒙古名杜爾鵲山蒙古名沙齊哈而本脈極東接蘇尼特部右翼界者爲什吉岡圖山其中石徑崎嶇溪壑幽深環山樹木隨地林立山澗有水之地蒙

民零星而處又連岡平阜怪石槎枿童堆沙磧地勢低凹者亦間有之自什吉岡圖山而東經蘇尼特左旗山脈陷于沙漠中若隱若顯絕無峭峯惟突出餘支散在各地耳在右翼旗境內有日月山布爾色克山克什克山福一名和爾和山察罕波托科山德林山雙金山俄爾綽克山巴倫明陀羅海山哈爾巴和山高者數百尺低者六七十尺地多沙濼產鹽質草木稀少間有怪石在左翼旗境內有色柯爾山博錐陀羅山祥古山和錫摩克山巴延特克山阿魯克山喀爾他和碩山其向東自沙漠中拔高白見者曰庫庫勒山循山而東入阿巴噶旗右翼境爲磧首之地群山皆空瀰漫無際更東則半伏半起漸行出沙漠中而散在旗境內者有朱爾哈爾陀羅海山門綽克岡阿珀濟哈山霸特山色吉盧山地多可耕

湖泊泉流縈繞其間積沙最厚之地細柳連生其色蔥鬱夏日遙望宛如綠紗自阿巴噶而東入阿巴哈納爾部山脈傾向東南行曰巴賴都爾山色爾騰洪果爾山察罕阿魯克山喀喇阿魯克山山勢或高或低陰涼川流經其間塞蘆徧生山坡其散在旗南境者小阜高坂以十數計其最著稱者曰博羅溫都爾岡更南則平坦無峻峯矣陰山山脈延亘塞外者自是而終焉

興安山脈崑崙東北最大之支也起克什克騰旗北陰山伏處山勢自西南而東北傾斜行經內蒙古東四盟境內直入黑龍江省更循黑龍松花兩江蜿蜒而東直底於海向南有分支二馳亘黑龍江吉林兩省境內一爲長白山脈一爲伊勒呼里山脈兩省內之巨川多出其麓山蒼莽兀疊數百里望之若虎蹲

踞上多杉松雜以奇草怪木層巖色石青翠毓秀中含五金各
礦更有火山噴氣如雲夏日望之陸離光怪時現五色山高達
雪線平均三千五百尺至四千尺溪谷之間野花如織蜿蜒幾
四千里或爲之字形或爲弓形其在蒙古境內者爲戈形滿蒙
天然之界山也長約八百里餘今圖咸稱爲大興安嶺中分爲
二段南段以蘇克蘇魯山爲最高之峯長約四百餘里北段以
索岳爾濟山爲主長亦四百餘里

蘇克蘇魯山興安嶺最初山脈之高峯也自克什克騰旗海
喇喀山起循察罕木倫河源北行曰默爾哲嶺又西北爲喀
拉坎山又北卽蘇克蘇魯高峯南起浩齊特部東接札魯特
部西連烏珠穆沁部分東西二支東支亘於太布蘇圖湖與
察罕湖之間曰音爾巴爾山特里野山更東山脉次第低平

直底於科爾沁平原西支向沙漠侵入岡阜比立因之向西
注流之水多瀦爲小湖或湮沒於沙漠中此外突起突伏脉
連而形斷者大小以數十計西至百一十七度東至百二十
二度凡烏珠穆沁札魯特阿魯科爾沁科爾沁諸部之山皆
興安山脈也

那哈太山在科爾沁右翼中旗東又東爲烏蘭峯旗西有蒙
格山距旗三十里一曰鮮卑山旗北二百里有哈祿那山又
北五十里有胡凱山旗東北有木勒推山布古特山旗西北
有奎屯山其在右翼前旗東南八十五里曰龍門山九十五
里曰布惇山百二十里曰巴虎山右翼後旗北二百二十里
曰朱噶爾岱山又二十里曰慶哈山卓索台山旗東北百五
十里曰錫伯圖山二百一十里曰納濟山三百里曰愛起錄

山又札魯特旗東右翼南十八里曰札拉克山旗北百里曰
敖塔山百二十里曰僧機圖山山多花木又曰花山山上有
洞通明布雅乃河出其下百四十里曰蛇山百九十里曰小
青羊山二百里曰吉蘭陀羅海山左翼東北九十里曰屈劣
山北四十里曰阿爾坦噶達蘇山密林叢翳松柏爲多又有
奇勒巴爾哈爾罕山左翼札薩克駐其南水草豐饒地多可
耕時花星爛蔬菜成畦又有圖爾山右翼札薩克駐地布顏
河經其西又阿魯科爾沁旗東三十里曰伊克托灰山旗南
四十里曰庫格圖山旗西五十里曰刻呼納山旗北十五里
曰都蘭山七十里曰巴哈喀喇山二百三十里曰蘇克素爾
山又烏珠穆沁右翼旗東三十五里曰布祜圖山禿河出其
西麓又旗西六十里曰喀喇圖山旗西北百九十里曰烏里

雅蘇台山札薩克所駐曰巴克蘇爾哈台山又左翼旗鄂爾
虎河繞其牧地當索岳爾濟山之西境內河泊多而鮮澗阜
惟東向接索岳爾濟山有列坡峻立與山相連云

索岳爾濟山興安嶺蒙境內最高之峯也蜿蜒數百里西麓
臨大漠東北抵呼倫貝爾城南山高據形勢最低之峯約二
百尺複嶂懸厓煙嵐蒸鬱遙望雲影粼粼石幢風葉峭壁雨
苔樹木成林間有耕地最高之峯有至四千尺者左右分支
四出隨地異名其延亘桂勒里河烏龍楚河之間曰胡蘇台
山密琅烏山察巴齊拉庫哈達山又有厄伯爾山阿魯塔爾
山穆克圖山爲喀爾喀河綽爾河之分水嶺又有厄赫魯兒
山雅爾河五大源既合後流經其西麓又有朝那里山鷄秦
河流經其北又有噶爾必鄂模喀山綽爾河出其北麓又乞

兔山在綽爾河之南與雅克山對峙連峯蔓延形勢險阨又有厄伯爾哈巴拉山淘爾河上源之一出其南麓山長二百餘里山有門河經其中出山後合于桂勒里河又有阿魯他拉奇嶺喀爾喀河出其西麓自嶺而北達呼倫貝爾與雅克山相連續由雅克山而北爲黑龍江境山勢益形開展奔突四馳爲滿州諸巨山之祖云

張烏齋先生曰古今之說昆侖者五于闐也肅州也大荒也青海也西藏岡底斯也于闐之說肇自漢武史記大宛列傳曰張騫使西域還爲天子言于真之西水皆西流注西海其東則東流注鹽澤鹽澤潛行地下其南則河源出焉多玉石鹽澤去長安可五千里其後騫死漢使窮河源河源出于真其山多玉石采來天子按古圖書名河所出

山曰昆侖云按鹽澤卽漢書所云蒲昌海山海經所云渤
澤于寘東流之水爲今塔里木河東至哈喇沙爾城東南
入於羅卜淖爾卽鹽澤也水旣入淖爾潛行地下又東南
千五百餘里至青海巴顏哈喇山麓伏流始出鶩所謂河
源也武帝按古圖書名于寘山曰昆侖其山蜿蜒磅礴直
抵衛藏古圖書之言本無差謬特不可遂以于寘山爲昆
侖耳或者以昆侖出玉意惟于寘足以當之原武帝初意
不過因鶩言河源地多玉石故發使探玉產何地以決河
源所在非以有玉無玉斷其是昆侖非昆侖也且此論創
自張騫非古圖書所有爾雅中下二篇多後人增益九府
章曰西北方之美者有昆侖虛之璆琳琅玕焉此產玉之
說始見於傳記者也淮南子因之采其文入墜形訓晉代

僞允征因之曰火炎昆岡玉石俱焚并羸其辭於古經而
昆侖產玉之說深入人心矣夫山經所志有玉之山所在
皆是何獨昆侖則據此以定昆侖者非也漢書地理志敦
煌郡廣至縣有昆侖障金城郡臨羌縣西北塞外有弱水
昆侖山祠此肅州昆侖之說也按志所謂祠蓋如今嶽廟
曰障障隔也山之小者初不以當河出之山東漢延光中
敦煌太守張璠上書請以酒泉屬國吏士二千餘人集昆
侖塞擊呼延王李賢卽引前志之昆侖障證之張守節史
記正義云肅州卽小昆侖非河源出者皆不迷謬而畢氏
沅郝氏懿行用以說山海經之昆侖夫山經方位錯互至
不足據乃引班志證成之是以不狂爲狂也且經明云河
水出焉如畢郝所說則是昆侖反居積石上游西北千餘

里矣况肅州亦安有熊熊魄魄方八百里高萬仞如是大山也哉後魏昭成帝時馬岌上言酒泉南山卽昆侖之體刪丹西河名曰弱水禹貢昆侖在臨羌之西卽此明矣夫體之云者由本而枝由枝而幹脈絡通貫之謂也如太行八陁隨地異名均謂之太行云爾今考岡底斯脈分二支一支直東趨爲張騫所稱南山一支過和闐西北趨環二千里統名葱嶺葱嶺又東趨爲天山互回靈北至巴里坤而止以其與昆侖同體故卽假昆侖之名名酒泉南山特用以證禹貢則舛知者酒泉郡乃漢武所置若昆侖王山實在此郡豈有舍其域中別指于寘者哉則所謂昆侖在肅州者不足辨也漢書律厯志曰黃帝使冷綸自大夏之西昆侖之陰取竹之解谷水經注引外國圖云從大晉國

正西七萬里得昆侖之虛此大荒昆侖之說也按張華博物志曰張騫度西海至大秦國西海之濱有小昆侖殆卽班酈之所謂昆侖矣然曰小昆侖別乎大昆侖而言也華雖未實指大昆侖之方要亦不以此當河出之山爾雅曰三成爲昆侖邱善長曰東海方丈亦有昆侖之稱海外尤多大山名曰昆侖何不可者而脈水尋原自有主名後人求其山不得乃推而遠之大荒之外此又不足深辨者也

萬季野胡東樵引大荒經水經證爲海外之昆侖河源紀略已詳辨之茲不及杜君卿云吐蕃自云昆侖山

在其國中西南河之所出也夫唐代吐蕃之境北際松涼南及嶺茂地方萬有餘里彼謂昆侖在其國西南原非妄語而君卿據之以說昆侖則誤何者君卿所據者命使往來之吐谷渾也是卽劉元鼎紫山之說耳唐書吐蕃傳曰

河之上流由洪濟梁西南行二千里水益狹其南三百里

三山中高而四下曰紫山古所謂昆侖者也彼曰閭磨黎

山按洪濟梁在今河州之西北唐積石軍地也紫山今庫

爾坤山巴顏哈喇山阿克塔沁山巴爾布哈山三山並峙總名庫爾坤山元鼎特窮極青海之境

而止元人近指大雪山爲昆侖則更在紫山東南千餘里

矣大雪山番名亦耳麻不莫喇今名阿木奈瑪勒占木遜實大禹導河之積石山也夫以昆侖爲在吐蕃蓋

自古及唐始有地名可稽惜又爲元鼎諸人所誑異說滋

繁戴氏震水地記亦仍此誤然張騫稱鹽澤潛行地下其南河源出焉今

羅布淖爾之水實溢出於青海之境河既更有上源則昆

侖必不在青海明甚而齊氏水道提綱顧依違其辭是不

達也水經注引釋氏西域記括地志通典通考志皆從此轉引曰阿耨達大山

其上有大淵水宮殿樓觀甚大焉卽昆侖山也阿耨達山

卽今西藏之岡底斯山在後藏達克喇城東北三百餘里直青海西南五千五百餘里其山四支北出者曰僧格喀巴布山與和闐之尼莽依山南北聯岡尼莽依水經注所謂仇摩置也黃河初源實出於此綜而論之漢武名于崑山爲崑侖已確知崑侖之在西南吐蕃自言崑侖在其國西南已確知崑侖在今衛藏而藏地自古不隸版圖漢唐命使無至其域者故沈彞湮鬱以至今耳康熙間龔定西藏仁皇帝諭謂岡底斯爲眾山水之根於是地志家轉相鈎考崑侖眞山始軒露於世太史公譏張騫等烏覩所謂崑侖洵哉其未之覩也

詳見徐氏西域水道記

或曰古稱崑侖皆主

西北故溝洫志載齊人延年之言曰河出崑侖經中國注勃海是其地勢西北高而東南下也云云今岡底斯遠在

西南得無與古說戾歟曰禹貢敘昆侖而不言爲河所自出禹本紀言河出昆侖而不詳其山在何方延年上書在漢武末年大約爲西北之說者皆既窮河源之後之論也

爾雅山海經淮南子說文解字水經

彼見武帝指于寘山爲昆侖于寘在西

域南西域在中國西北故紛紛云爾也然古說昆侖在西南者其徵亦有二一徵之史記封禪書書曰濟南人公玉帶上黃帝時明堂圖明堂圖中有一殿四面無壁以茅蓋通水圜宮牆爲複道上有樓從西南入命曰昆侖天子從之入以拜祀上帝焉陸賈稱黃帝巡遊四海登昆侖山起宮室於其上夫惟實至昆侖圭方定位故明堂西南之門命曰昆侖也黃帝正名百物必不誣矣一徵之穆天子傳傳曰

傳中地里爲妄人所亂故詳說之

戊寅天子西征鶩行至於陽紆之

山河伯無夷之所都居是謂河宗氏河宗柏天逆天子燕

然之山癸丑大朝於燕然之山河水之阿陽紆者周禮職方氏冀州藪曰陽紆蓋在

今山陝之交而地頗近北或據爾雅郭注謂在右扶風汧縣及淮南高注謂地近華陰在今陝州閿鄉縣者非也何以明之以下文河宗及燕然之山

之史記趙世家正義曰河宗在龍門之上流嵐勝二州之地唐嵐州今嵐縣地唐勝州今鄂爾多斯右翼後旗黃河南流處也燕然之山即班固為竇憲

刻石勒功之山寰宇記曰在振武軍金河縣近積金河故城在今歸化城南水經注於傳文前後惜不加察河水開端即引此傳以證河水所出之陽紆

陵門山而斥高注之非真矣且即其所引淮南子禹治洪水具禱陽紆之文證之具禱乃治水之始事禹治水始冀州書曰既載壺口壺口龍門上口在

今吉州西南陽紆龍門界治毗連故周禮以為冀州藪也蓋循河而北出塞及大漠之積矣

已未大朝於黃之山柏天乃乘渠黃之乘為天子先以極

西土乙丑西濟河爰有溫谷樂都河宗氏之所遊居丙寅

用申八駿之乘以飲於枝詩之中積石之南河乙丑上距

已未七日濟河越河關而南也黃山山海經郭注曰始平槐里縣有黃山槐里今西安府興平縣也

溫谷樂都疑即西羌傳之大小榆谷枝詩之中疑即唐書所謂黃河九曲之地揚矩奏請為金城公主湯沐之所也地在今西甯府西南塞外則

則

由今西安出河州渡河而西南征矣丁巳西南升

文缺

之所

主居戊午遂宿於昆侖之阿赤水之陽辛酉升昆侖之邱

以觀黃帝之宮而封豐隆之壑計自乙丑濟河至戊午始

宿昆侖之阿凡五十四日此五十四日之中高策八駿日

行百里已不下五千餘里

略以由興平至積石南河七日程準之

或者穆王當日

真至今之衛藏故水經注於引釋氏西域記阿耨達大山

下復引此傳證之曰卽阿耨達宮也要之積石已在西南

更由積石而西南行

傳又曰自河首襄山以西南至于春山珠澤昆侖之邱

則傳所謂昆

侖者必非肅州青海和闐亦無緣遂抵大荒之外章章矣

胡東樵疑昆侖有二一在西南爲黃河之所出一在西北

爲弱水之所環不知弱水之所環者卽班志所稱昆侖障

昆侖山祠馬岌所稱酒泉南山也二而一者也又按禹貢

以昆侖與析支渠搜並舉古析支地在今青海和碩特前
頭旗南左翼中旗土爾扈特南前旗及察漢諾們罕喇嘛
游牧處渠搜在今蘭州北長城外河套地準以禹貢涼州
之域渠搜在涼州西北析支在涼州西南昆侖又在析支
西南在禹貢統爲西戎矣則康成謂禹貢昆侖非河所出
者又非也夫使禹時昆侖之名已多歧互豈應於河源大
山反昧標識哉

